

# WIZARA YA MAMBO YA NJE NA USHIRIKIANO WA AFRIKA MASHARIKI

Simu: +255-26-2323201-7  
Nukushi: +255-26-2323208  
Barua pepe: nje@nje.go.tz  
Tovuti: www.foreign.go.tz



Mji wa Serikali,  
Mtumba,  
S.L.P 2933,  
40466 DODOMA

## TAARIFA KWA UMMA

### RAIS SAMIA NA RAIS KAGAME WAKUBALIANA KUIMARISHA BIASHARA

**Dar Es Salaam, 27 Aprili 2023**

Rais wa Jamhuri ya Muungano wa Tanzania, Mhe. Dkt. Samia Suluhu Hassan na mgeni wake Rais wa Jamhuri ya Jamhuri ya Rwanda, Mhe. Paul Kagame wamekubaliana kuimarisha mambo mbalimbali hususan biashara, miundombinu ya bandari, mradi wa umeme wa Rusumo pamoja na masuala ya ulinzi na usalama.

Wakizungumza na waandishi wa Habari Ikulu Jijini Dar es Salaam, Mheshimiwa Rais Dkt. Samia amesema ziara ya Mheshimiwa Kagame nchini imetoa fursa ya kufanya tathmini ya masuala ya ushirikiano kati ya Tanzania na Rwanda na kubuni mbinu mpya za ushirikiano zaidi.

Katika mazungumzo ya viongozi hao wamekubaliana kukuza na kuimarisha biashara na kuweka miundombinu ya kukuza biashara kwa sababu kiwango cha biashara kilichopo hakiendani na rasilimali zilizopo katika nchi mbili hizi kwa kuzingatia uhusinao mzuri uliopo kati ya nchi hizi.

“Katika kukuza biashara nimempa taarifa Mheshimiwa Rais Kagame kwamba Tanzania tunafanyia kazi uimarishaji wa bandari zetu hasa za Dar es Salaam na Tanga ambazo ndiyo zinatumiwa na Rwanda,” alisema Mheshimiwa Rais Dkt. Samia na kuongeza kuwa wamejadili namna ya kuimarisha njia nyingine za mawasiliano ili Tanzania iweze kutoa huduma kwa ufanisi nchini Rwanda na nchi nyingine zinazoizunguka.

“Kadhalika tumezungumzia suala la mradi wa kuzalisha umeme wa maji wa Rusumo ambao hadi sasa unaendelea vizuri na tumekubaliana kuuzindua kwa pamoja. Pia tumezungumza masuala ya ulinzi na usalama na tukakubaliana vyombo vyetu vya ulinzi na usalama viendeleo kufanya kazi kwa pamoja ili kuimarisha ulinzi kwenye nchi zetu lakini pia kwenye ukanda wetu wa Jumuiya ya Afrika Mashariki,” alisema Dkt. Samia

Tume ya Kudumu ya Pamoja ya Ushirikiano kati ya Tanzania na Rwanda pamoja na Tume ya kufuatilia utekelezaji wa vitu ambayo havijamalizika zimeelekezwa kukutana Tanzania na kuyafanya kazi kwa pamoja na kukamilisha kwa wakati na kuwawezesha viongozi kusaini makubaliano ili kuendelea kufanya kazi kwa pamoja.

Kwa upande wake Rais wa Jamhuri ya Rwanda, Mheshimiwa Paul Kagame amesema dhamira ya Rwanda na Tanzania ni ya dhati ya kujenga misingi ya kiuchumi, kisiasa, kijamii na kitamaduni kwa maslahi ya pande zote kwa kuwa Rwanda na Tanzania zimekuwa na misingi imara ya ushirikiano yenye kuboresha Maisha ya wananchi wake.

“Wajasiriamali wa Kiafrika wanatupa hamasa ya kuendeleza ushirikiano baina yetu na ushindani wa kibiashara katika soko la dunia jambo ambalo limekuwa likisaidia kuinua uchumi wetu,” alisema Rais Kagame.

Rais Kagame amempongeza Rais Samia kwa jitihada za kutafuta suluhu hususani katika Jamhuri ya Kidemokrasia ya Kongo (DRC) na katika Jumuiya ya Afrika Mashariki. Kujenga misingi ya amani ya kudumu kwenye Jumuiya ya Afrika Mashariki ni suala muhimu sana kwa maendeleo ya Afrika kwani amani na utulivu ni hitaji muhimu kwa maendeleo ya umoja wa Afrika.

Ziara hiyo ya kikazi imehudhuriwa na Waziri wa Mambo ya Nje na Ushirikiano wa Afrika Mashariki, Mheshimiwa Dkt. Stergomena Tax (Mb.), Waziri wa Nchi Ofisi ya Rais Ikulu – Zanzibar Mhe. Jamal Kassim Ali, Waziri wa Uwekezaji Viwanda na Biashara, Mhe. Dkt. Ashatu Kijaji, Waziri wa Habari, Mawasiliano na Teknolojia ya Habari, Mhe. Nape Nnauye,

Waziri wa Ardhi, Nyumba na Maendeleo ya Makazi, Mhe. Dkt. Angelina Mabula, Katibu Mkuu Wizara ya Mambo ya Nje na Ushirikiano wa Afrika Mashariki, Balozi Dkt. Samwel Shelukindo, Balozi wa Rwanda Nchini, Mhe. Meja Jenerali Charles Karamba na viongozi mbalimbali waandamizi kutoka Tanzania na Rwanda.

**Imetolewa na:**  
**Kitengo cha Mawasiliano ya Serikali**